

In signal vers Berna per ils tschains d'aua

Regenza e parlament sustegnan l'incumbensa Kollegger

■ **(anr/fa) Dacurt èn la regenza grischuna e las autras regenzas dals chantuns muntagnards sa defendidas cunter la diminuziun dals tschains d'aua. Senza cuntravuschs ha il parlament incumbensà la regenza da cuntinuar il cumbat.** En collavuraziun cun l'Uffizi federal d'energia (UFE) vulan ils concerns d'electricitad ed ils proprietaris da las ovras idraulicas scursanir fermamain ils tschains d'aua. «Flexibilisaziun dals tschains d'aua», sa numna quest project. «Effectivamain sa tracti però da mitigiar las perditas da milliardas ch'èn resultadas da decisiuns strategicas sbagliadas», scriva *Andy Kollegger* (pbd, Cuira) en sia incumbensa a la regenza. Quella ha la finamira da mantegnair ils tschains d'aua almain sin il nivel odiern ed è vegnida sutscritta da 74 deputadas e deputads al cussegl grond. Gievgia ha tractà il parlament grischun quest'incumbensa.

Mess en dumonda las perditas dals concerns

Andy Kollegger ha ditg ch'el saja dublamain cuntent, «la regenza è pronta da sorprendere quest'incumbensa ed ella sustegna tut ils puncts menziunads en quella.» El ha ludà cusseglier guvernativ *Mario Cavigelli* che s'ha ingaschà ensemen cun ils collegas da la Conferenza da las regenzas dals chantuns alpins (CRCA) per il mantegniment dals tschains d'aua. Menziunà ha el er il sustegn da la Cuminanza d'interess da las vischnancas concessiunaras grischunas: «Ils commembers da questas vischnancas han da l'entschatta davent preni cleramain posiziun e cumbatti per il mantegniment dals tschains d'aua sco ch'els èn ussa.» Kollegger ha già il sustegn da *Marcus Caduff* (pcd, Lumnezia), *Lorenz Alig* (pld, Ilanz/Glion), *Paolo Papa* (pbd, Calanca), *Emil Müller* (pbd, Sur Tasna), *Jon Pult* (ps, Cuira) e *Leo Jeker* (pbd, Tschintg Vitgs).

Els tuts han menziunà la perdita da fin a 75 milliuns francs l'onn ch'ina reduziun dals fits d'aua avess per consequenza per chantun e vischnancas. Els han dentant era dubità ch'els concerns d'electricitad hajan propi fatg deficit cun l'energia idraulica. «Fin uss na preschentan ils concerns da maniera transparenta las cifras da lur affars ch'els fan cun la forza d'aua», han ditg plirs dals deputads.

Critica a la formulaziun absoluta

Durant la discussiun davart l'incumbensa hai dà era vuschs criticas. *Theo Joos* (pcd, Razén) ha ditg ch'i vegnia ad esser a lunga vista era necessari da tractar davart ina soluziun flexibla cun tschains d'aua magari in zic pli bass. Sco impiegà d'incon-

cern d'energia ha el annunzià ch'el sa regnia da la vusch. *Walter Vetsch* (pld, Jenaz) ha manegià che l'incumbensa saja formulada da maniera memia assoluta, «sco fin uss e nagut auter». A ses avis nun è quai ina buna basa per tractar cun ils partenaris. Era *Karl Heiz* (pld, Poschiavo) e *Rudolf Kunz* (pld, Cuira) eran da l'opiniun ch'ins stoppia pussibilitar il dialog cun ils concerns d'electricitad.

«Nus essan tuts en la medema bartga»

Cusseglier guvernativ Mario Cavigelli ha ditg che las regenzas dals set chantuns muntagnards plus quellas da Berna e da l'Argovia hajan cumenzà l'onn 2012 a collavurar. «Nossas trais finamiras eran

da ramassar buns arguments per mantegnair ils tschains d'aua per la resursa 'aua'. Alura vulevan nus era vegnir a conuscher ils retgavs resp. deficits ch'els concerns fan cun la forza idraulica ed ans basond alura sin quests fatgs prender posiziun en chaussa.» El ha menziunà che tut las vischnancas grischunas, e betg mo las concessiunaras, profitian dals tschains d'aua. «Nus tuts essan en la medema bartga, tuts han interess ch'els tschains d'aua restian almain sin il nivel odiern.» Da quel avis era la gronda maioritad dal parlament grischun: L'incumbensa è vegnida acceptada cun 100 cunter 0 vuschs e sis abstenziuns. «Quest è in ferm signal a l'adressa da Berna», ha commentà Andy Kollegger il resultat.



L'incumbensa dad Andy Kollegger ha la finamira da mantegnair ils tschains d'aua almain sin il nivel odiern.

FOTO J. MENOLFI